

YEMESA 'INA 'ETOLADI

Yemesa Yesu 'ana toemisao 'idi leta gete 'i'etoladina, 'ie'iteda 'aene tada gwausowala miyamwau be 'ebe toona 'ediya. Geya'abo emisa namo Yesu 'ena, ta esi ematamatana be ona bobo'ana wate, ta geya'abo taguiguinuwa me bale'u nadigega. Gomabeso tada lemedi, ta geya'abo toesaesao nuwada si'ewa'ewa, manuna ma'etamo toesaesao 'idi bubuna to'umalina manuna Yaubada lolina mwauna 'ida 'ebwa'edi. 'Ilobwenena be miyamwau 'ediya tada 'alama'i'ita be tasisida Yaubada 'ena, be 'ida 'etoseyeda.

Ona oboboma

1 ¹Kagutoki 'omi Yaubada 'ina tomotaiyao susu tuwelo 'ediyega waesugalagalaya sena yauyaudi 'ediya. Gete 'imi leta ya'etoladinawa, Yaubada be 'Inapwana Yesu Keliso 'idi toguinuwa 'abo'agu.

Emisa be sinasinapu

²Tasigwao, tuta simeemai 'ediya 'abo 'ebe toona yaudi ta wate mwaudi walobadi, manudi wada gwausowala, ³ta wada mwalatoni 'aene gete 'ebe toona 'imi emisa manuna be 'enega wada toolopa'ala. ⁴^bEnega wada 'ita'i'isimi be wada toolopa'ala 'ai'aila, be gete 'enega 'imi bubuna maibo'ana 'ida bobo'ana.

⁵Ta 'abo yaisigedi 'omi Yaubada 'ana mwalatoi 'ai'aila nigeya 'emiya, Yaubada 'ena wada sidasida, be 'emiya 'ida 'ebwaya, manuna tauna Totagwala ta To'ebwaya 'ai'aila. ⁶^dTa wada sidasida ma imi emisa 'ai'aila ta geya'abo ma imi enuwanaluwa, manuna taudi ma idi enuwanaluwa taudi nadigega lisu silasalasa bwagabwagaya, 'abo yagila 'isiyesiyeyedi.

⁷Taudi wate geya'abo sinuwanuwa 'aene 'ebweu to'ase sida loba 'Inapwana 'enega, ⁸manuna ma idi enuwanaluwa 'idi guinuwa yauyaudi 'ediya.

^a 1:2-3 Lo 5:3-5; 1 Pi 4:13-14 ^b 1:4 Md 5:48 ^c 1:5 1 Kin 3:7, 9-12; Md 7:7

^d 1:6 Ais 57:20 ^e 1:7-8 Ye 4:8; Lu 16:13

Toesaesao be togomabesoyao.

⁹^fTa toekalesiyao gomagogabesodi, 'abo Yaubada 'igilagasidi, sida gwausowala sinabwana.

¹⁰^gTa wate toekalesiyao toesaesao 'ilobwenedi be sida gwausowala 'abo Yaubada 'isa'u mwa'utedi, manuna toesaesao sisasawala 'atuwa pwatula senidiyao. ¹¹Manuna 'abo sinala 'iaala 'ediya, 'etamo 'ina waiwaiyega senina nidi si'oapelu be sibebe'u, ta wate 'adi 'ita bobo'ana 'igugumwala. Nadigega tuga toesaesao ma'etamo sida paipaisewa ta 'idi mwawasa nigea 'ida so'i.

'Ebe toonayao

¹²^hAbo yaita 'oyo 'ebe toonayao 'ediyega 'utoolo pa'ala, 'uda gwausowala. Manuna 'amu pali bobo'ana Yaubada 'enega 'uda loba, nate yawasi ataya. Gete Yaubada 'ina onaupaupa maibo'ana 'eday, 'abo taobobome.

¹³ⁱTa 'abo yaita 'oyo 'ebetoo nidi 'ulobadi, geya'abo 'unuwanuwa gesi be 'ugwae 'aene "Yaubada 'itootoogu." Manuna tomota nigea sawesawediya be Yaubada sitoo be 'aene yage to'umalidi 'ida guinuwedi, ta Yaubada wate nigea tomota 'ida toodi be yage to'umalidi sida guinuwedi, ¹⁴ta esi taudamo 'ida yalakwaiya 'enega nuwanuwa to'umalina 'ilisilisida. ¹⁵^jBe 'ida yalakwaiya nina 'enega guinuwa to'umalina 'iapwesa, 'enega wate muliyega mwawasa 'iapwesa.

¹⁶Kagutoki tasigwao, geya'abo 'imi nuwanuwa wasa'usa'u gesiyedi. ¹⁷^kTa wada nuwa'i'isi 'aene 'ebwayadaita bobo'adi be wate oboboma bobo'adi maibo'adi galewega simai Yaubada 'enega, tauna tuga maedanao 'adi tomweluluwa, ta wate nigea sa'i 'ida esa'ugelasa, nadigega yauyaukwa sisa'usa'u gelasa.

¹⁸^lGa 'ina nuwanuwa tauna 'enega, ta wate 'ina ona'ai'aila 'enega, 'igimi mweluluida be 'aene 'abo'ada 'ina mwelumweluluwao maibo'adi tada loetana sinedi.

Ona 'ana nono be 'ana guinuwa

¹⁹^mTasigwao, 'ilobwenemi be ona wada enono 'ai'aila, ta geya'abo onalimana be gamwasowala 'ediya waewaiwai. ²⁰Manuna tomotai 'idi gamwasowala Yaubada 'ina 'eda palupaluna nigea 'ilobwelobwene. ²¹ⁿEnega 'imi bubuna be 'imi guinuwa to'umalidi wada pilisinedi, be

^f 1:9 Ye 2:5; Yel 9:23-24; 2 Ko 6:10 ^g 1:10 1 Ti 6:17; 1 Pi 5:5; Lu 12:16-21

^h 1:12 Dan 6:1-28; Lu 6:22-23; Ye 5:11 ⁱ 1:13 1 Pi 2:11; 1 Ko 10:13 ^j 1:15 Lo 6:23

^k 1:17 1 Yo 1:5 ^l 1:18 1 Pi 1:23; Yo 1:12-13 ^m 1:19-20 Ona 10:19; Tolog 7:9; Md 5:22

ⁿ 1:21 Kol 3:8

wada tagwalemi Yaubada 'enaya, ta wate Yaubada ona nina 'atemiya 'iasonaya wada emisei, be wada ematamatane, be 'enega 'etoseyana waloba.

22^oTa geya'abo waenono namo, nate wakabokaboemi tuga, ta esi wada guinuwa wate. 23^{Manuna} 'eguma yaita 'ienono namo ta geya'abo 'iguiguinuwa, tauna 'atuwa tai 'ebweu gelasi 'ena maninina 'i'itena, 24^{ga} muliyega 'itauya, ta tuta kukupana 'ena maninina 'ana 'ita 'inuwa pupulena.

25^{Ta} Yaubada 'ina lolina palupaluna ga 'enega 'ida to'umalinala 'ediyega 'ili'amida. Ta 'abo yaita lolina nina manuna 'inuwanuwa ta 'iguiguinuwa, ta nigea 'ida nuwapupulaya, tauna tai nina 'ina guinuwa maibo'ana gwausowala daisinamo.

26^PTa 'eguma 'ebweu tai 'inuwanuwa gesi be 'aene tauna totapwalolo 'ai'aila, ta nigea 'ina ona 'i'ita'ita'i'isi, 'ina tapwalolo yage besobeso. 27^qTa esi tapwalolo 'esasena be palupaluna Yaubada Tamada matanaya gete, 'aene taudi sinasinagenidi be kwabulao 'idi miyamwau 'enaya tada lemedi, ta wate geya'abo bubuna bale'u 'enega tagiegie bailida.

Geya'abo tomota 'adi 'ita manuna taweyaweyala.

2 1^{'Ye} tasigwao, 'omi 'ida 'Inapwana Yesu Keliso tobobo'ana sana 'ana toemisao, 'enega geya'abo 'imi esinuwa toesaesao 'ediya wasa'usa'u. 2^{'Enega} 'abo tomota 'eluwa siluguwa 'imi anuwa tapwalolo solanaya, be 'ebweu toesaesa ma 'ana 'oama bobo'ana ta wate 'ana iyaiyala bobo'ana, ta 'eluwena gomagomabesona 'ana 'oama baibailina, 3^{'enega} 'abo siteluwa nidi wa'itadi 'iabe toesaesa nina wa'amayabe be 'ena wada gwae, "Ebemiya bobo'ana gete 'ena 'uda miyatowa," ta togomabeso nina 'iabe 'ena wada gwae, "Nada 'utoolo," nai "'Uda miyatowa seyaya." 4^{'Ta} 'abo 'imi esinuwa gete nadigega, 'ana 'ita nigea bobo'ana, manuna nuwanuwa nina nigea palupaluna.

5^{'Tasigwao,} 'igu ona gete wada nonodi, 'aene Yaubada togomabeso bale'uya 'iesinuwedi be emisa 'enega sida eesaesa. Manuna Yaubada 'ina 'ebeloina 'iona upaupaena be 'ena sida apwesa, 'abo tauna siobobomena. 6^{'Ta} esi togomabeso nigea wa'ama'amayabedi. Ta sa'i taudi toesaesao lolina mwau si'ebwa'ebwa'emi, ta wate si'alaetuetunemi 'ebe etala 'ediya.

7^{Wada} nuwa'i'isi wate 'aene 'ida 'Inapwana 'ana esana 'i'ebwa'eda, ta taudi esiya 'ana esana nina si'awa'awa to'umaliye.

8^{Ta} 'ida 'Inapwana 'ina lolina sinabwana Buki Tabu 'ena 'igwae, "Gosemwao 'uda obobomedi nadigega tauyo 'amu oboboma." Loina getei 'abo 'umuliya 'ai'aili, gete bubuna bobo'ana. 9^{Ta} 'abo 'aina tomota

° 1:22 Lo 2:13 P 1:26 Sam 141:3 ° 1:27 Ais 58:6-7 ° 2:1 Gu 10:34; 1 Ti 5:21; Ye 2:9
 ° 2:4 Yo 7:24 ° 2:5 Md 5:3 ° 2:6 Gu 16:19

wa'ama'amayabedi ta 'aina tomota nigea, nate ni'atu lina nina wale'ole'oa, be taumi 'imi bubuna wagiegie to'umaliye.

¹⁰ Ta 'abo yaita lina 'ebweuna namo 'ile'oa, nate 'aene ni'atu lina maibo'ana wate 'ile'oedi. ¹¹ 'Manuna lina maibo'adi 'adi To'ebwaya 'ebweuna namo tuga, tauna 'iona 'aene, “Geya'abo loelata besobeso,” ta wate 'igwae 'aene, “Geya'abo loemwawasa.” Ta 'abo nigea waloyaloyawe besobeso ta waloemwawasa, nate ni'atu 'ina linao wale'oedi. ¹² 'Enega 'imi ona be 'imi guinuwa wada 'ita'i'isidi, manuna Yaubada ma'etamo 'ida esinuweda 'ina loinega, ta 'ina lina nina nate tomota 'ada 'etoli'ama manuna.

¹³ "Manuna 'abo yaita nigea gosenao 'i'ate'atenuwa 'ole'oleyedi, Yaubada nadigega geya'abo tai nina 'i'ate'atenuwa 'ole'oleye. Ta 'abo yaita to'atenuwa 'ole'ole, geya'abo Yaubada 'ina bwa'omatana 'imatamataute.

'Abo emisa nigea guinuwa ma'iyana emisa nina yage besobeso

¹⁴ Tasigwao, to'ase 'ana bobo'ana 'abo 'ebweu yaita 'igwae, “'Abo'agu ma igu emisa,” ta 'ina guinuwa nigea palupaluna. Sawesawenaya 'etoseyana 'ilobai 'ina emisega? Nigea, aga?

¹⁵ *Ta 'abo tanuwanuwa tasidao be nuudao manudi, taudi nigea 'adi 'oamamo ta wate nigea 'adi masulamo, ¹⁶ be 'ediya talo'aenuwa bobo'ana, tagwae, “Wada miya bobo'ana ta wada 'e'ai bobo'ana,” ta nigea lema ta'ebwa'ebwa'edi, to'ase 'ida ona 'ana bobo'ana? ¹⁷ Gete nadigega emisa nina 'ana ma'ama'ayau, 'eguma emisa namo, ta nigea guinuwa ma'iyana, emisa nina 'atuwa mwawamwawasina.

¹⁸ Ta 'abo 'aidi tomota sigwae, “Oyo ma imu emisa ta 'abo'agu ma igu guinuwa.” Ta 'abo'agu 'igu e'isa 'aene, “'Abo 'imu emisa nina nigea guinuwa ma'iyana, mwa'adega 'ana bobo'ana? Ta 'abo'agu gete 'igu guinuwega 'igu emisa yae'itemi.”

¹⁹ 'Oyo 'uemisa 'aene Yaubada 'ebweuna namo tuga, aga? Ga nate bobo'ana. Ta 'unuwa'i'isi 'aene Taumudumudulele ma gosenao taudi wate 'idi emisa nadigega, ta wate ma idi matauta. ²⁰ 'Oyo uwauwayo. Gete 'ebe e'ita ya'ebwa'eyo 'aene 'abo emisa namo, ta nigea guinuwa, nate yage besobeso.

²¹ *'Ebel'ita gete 'ebweuna: tubudai Ebelaamo 'ina guinuwa 'enega Yaubada 'i'awa bobo'anena. 'Ina guinuwa nina nate natuna Aisake 'itagwalena be 'aene 'ida taliyae Yaubada 'enaya. ²² Gete 'enega 'uda mwalatoni 'aene Ebelaamo 'ina emisa be 'ina guinuwa sipaisewa leleleya, ga 'ina guinuwega 'ina emisa 'ai'aila 'igieapwesena. ²³ 'Enega Buki Tabu 'ina simana nina 'ida apwesa 'ai'aila, 'igwae, “Ebelaamo

° 2:11 Sia 20:13-14 ° 2:13 Md 5:7; Md 6:14-15 * 2:15-17 Md 25:41-45; 1 Yo 3:17

° 2:21 Nug 22:9-12; Ib 11:17

Yaubada 'iemisena, ta 'ina emisa nina manuna ta Yaubada 'i'awa tai palupaluyena,” ga 'i'awa gosiyana. ²⁴'Enega 'uda mwalatoni 'aene ni'atu Yaubada 'i'awa palupaluyeda 'ida guinuwega, ta nigeya 'ida emisa namo 'enega.

²⁵^a'Ebe'ita 'eluwena gete: tauna tosogala nina Leabi 'ina guinuwa bobo'ana 'enega Yaubada 'i'awa palupaluyena, manuna Yosuwa 'ina toepilialealeyao 'eluwa 'ilemedi, ga mali 'eda 'ie'itedi ga 'enega 'i'etoseyedi.

²⁶Nadigega tuga 'abo ooda nigeya yaluyaluwanamo, nate ni'atu mwawamwawasina, ta 'abo emisa nigeya guinuwa ma'iyana, emisa nina mwawamwawasina.

'Ida ona tada 'ita'i'isi.

3 ¹“Tasigwao, geya'abo watootoo be yaumi waetoe'ita, ta wada mwalatoni 'aene 'abo tae'ita ta nigeya taguiguinuwe, ma'etamo Yaubada 'ida bwa'omatada sinabwana.

²Ona'ai'aila, maibo'ada loegesi taguiguinuwe. Ta 'abo yaita tauna nigeya ona to'umalina 'awanega 'ida apwesa, tauna tai 'esasena ta palupaluna, manuna sawesawenaya be oona maibo'ana 'iloina.

³^bNadigega tuga yobai osi 'adi 'ebe pwalowa 'awadiya tasa'u be 'enega tagiepanaisidi, be 'abo nuwanuwada mwa'o sitauyeda, pwalowa nina 'ana malakwao tagiyaidi be 'enega kapekapeyana yobai nina oona maibo'ana taloina.

⁴'Ebe'ita wate gete 'ebweu, 'eguma tanuwanuwa waga manudi, 'anabwa'ayoi waga sinabwadi be yagila sinabwadi 'ipilipiliyedi, ta 'adi pwalowa gidalina tuga, topwalowa nina kapekapeyana be waga nina 'iloina be mwa'o nuwanuwana be 'ida tauya, 'ida tauya tuga. ⁵^cNadigega tuga 'awada 'ina guinuwa, yage gidalina, ta sawesawenaya be yage sinabwadi 'iloinedi.

Gete wate 'ebweu 'ebe'ita 'aene 'abo kaiwe 'ala'alata gidalina pwatula 'ena taloe'abi, sawesawenaya be kaiwe nina 'enega nedu maibo'ana 'i'alaegumwali. ⁶^dTa 'awada nadigega kaiwe 'ina bubuna, manuna yage maibo'adi to'umalidi 'idi 'ebe e'ale. 'Enega ooda maibo'ana tagieto'umaliye 'awa nina gidalina 'enega. Ona'ai'aila, to'umalina maibo'ana 'imeema Seitani tauna 'enega, be yage maibo'adi 'awadega 'igieto'umaliyedi.

⁷Tomota 'abo'ada sawesawedaya be yobai tagiepanaisidi, taudi nadigega bomitawa be manuwa be yobai kawakawalidi ta wate iyanao, ⁸^eta esi nigeya sawesawenaya be 'awada tagiepanaisi. Manuna 'awadaya

^a 2:25 Yos 2:1-21, 6:17; Ib 11:31 ^a 3:1 Gu 20:28 ^b 3:3 Sam 32:9 ^c 3:5 Ona 16:27; Sam 73:8-9; Ona 26:20-21 ^d 3:6 Md 15:18-19 ^e 3:8 Lo 3:13

yage to'umali wawasae, ta bolausa simiyami, 'enega 'ana giepanaita mwau wawasae.

⁹Ona'ai'aila, 'awadega Tamada Yaubada tatuputupu ta wate 'awadega gosedao ta'awa to'umaliyedi, taudi Yaubada 'imweluluidi tauna 'ana 'ita nadigega. ¹⁰^fEnega tasigwao, 'aene yage getedi nate 'awa 'ebweuna 'enega ona bobo'adi be to'umalidi siapweapwesama, nigea 'ana 'ita bobo'ana.

¹¹Ta tada nuwa'i'isi 'aene wewelupwa bwasina 'ana lotoona nigea 'ida giedumedumena, be 'aina tuta bobo'ana ta 'aina tuta dalelena. ¹²Manuna ola 'enega nigea kapekapeyana be bwasi bobo'ana taloba.

Tasigwao, nadigega tuga kaiwe nina damaya 'enaya nigea kapekapeyana be mwakiko^g uwana 'isa'u. Nadigega wate nigea kapekapeyana be sibweya^h damaya uwana 'isa'u. 'Ebe'ita nidi getedi nadigega tuga 'awa 'ina guinuwa.

Sinasinapu Yaubada 'enega.

¹³ⁱAbo yaita 'oyo ma imu mwalatoi, 'uda guinuwa bobo'ana ma imu nuwamwa'uta, be tomota sida 'ita be sida mwalatoni 'aene 'imu bubuna bobo'ana.

¹⁴Ta 'eguma wae'ipi'ipi be wagamwasowala mali tomota 'ediya, ta wate taumi 'imi nuwanuwao 'igiegagasimi be e'ita palupaluna wagiegie to'umaliye, ¹⁵sinasinapu nidi gete nadigega nigea galewega, ta esi tuga bale'u bubuniao 'adi yalakwaiya be Seitani 'ediyega. ¹⁶Manuna 'abo tomota sie'ipi'ipi be taudimo manudi sinuwauwa, gote 'ena sikwakwani be bubuna to'umalidi wate 'ediya siapwesa.

¹⁷^jTa 'abo yaita 'ina sinasinapu galewega 'imai, tauna 'ina bubuna nugana 'esasena, ta wate nuwasiwalowa 'alena, bubuna nuwana 'alena, egosigosiyana 'alena, 'atenuwa'ole'ole 'alena, ta 'aina wate uwanao bobo'adi siapweapwesa, ta nigea gosenao 'ida e'idi'idiyedi nai 'ida kaboedi.

¹⁸^kTa wate taudi togienuwasiwalowa 'idi guinuwea bubuna bobo'ana sigiegie apwese.

Bale'u 'ana nuwa'ewa.

4 ¹Mwa'adega ga losaiya be egewagewana siapweapwesa 'emiya? Nai 'alena taumimo 'imi yalakwaiyao 'ediyega, manuna tuta yauyauna mali nuwanuwawa be mali nuwanuwawa 'emiya sipaipaisewa.

^f 3:10 Ep 4:29 ^g 3:12 *mwakiko*: Kaiwe gete 'ebe'ita tuga, nadigega me Yudia 'idi kaiwe 'ana esana olibe. ^h 3:12 *sibweya*: Me Yudia 'idi kaiwe uwana 'ana esana oine (grape), 'ana 'ita nadigega sibweya uwana. ⁱ 3:13 Ep 4:1-2 ^j 3:17 Yob 28:28 ^k 3:18 Md 5:9
^l 4:1 Ga 5:17

² 'Aina tuta nuwanuwami be gosemiyao 'idi gwegwe wa'ewadi, ta nige ya sawesawemiya, 'enega waloemwawasidi. Ta yage nidi wayato'aiyedi nige ya sawesawemiya be wa'ewadi, 'enega gosemiyao 'ediya waegewagewana be walosaiyedi. Ta yage nidi nige ya wada lobedi manuna nige ya manudi wada sidasida Yaubada 'enaya. ³ "Ta 'abo wasidasida manudi, ta nige ya 'adi e'isa wada lobedi, 'alena gete 'imi sidasida nina nige ya bobo'ana, ta 'aene yage nidi manudi wasidasida nate taumimo 'imi gwausowala manuna.

⁴ "Omi toemisa kabokaboyao, wada mwalatoni 'aene 'abo bale'u bubunina waobobobome, nate Yaubada waetalauwale, manuna 'abo yaita bale'u bubunina nuwanuwana, tauna Yaubada 'ana saiya.

⁵ "Enega geya'abo Buki Tabu 'ina simana wa'awa'awa gidale tuta nina 'igwae,

“Yaluyaluwa nina Yaubada 'isa'una 'edaya nuwanuwana sinabwana 'abo'ada.”

⁶ "Ta esi Yaubada 'ina lema 'edaya sinabwa wawasae, manuna Buki Tabu 'ena 'isimana, 'igwae,

“Yaubada togagasa 'ediya 'i'etoboda, ta esi tonuwamwa'uta 'ediya 'itagwala be 'ida lemedi.”

⁷ "Enega Yaubada 'ena wada tagwalemi, ta Seitani wada guitoyase be tauna 'ida pilisinemi. ⁸ Ta wada mai Yaubada selabenaya be 'enega tauna wate 'ida wai selabemiya. Ta 'omi to'umalimi ta kabokabomi nimami wada 'utudi be 'atemi wada gie'esasedi, ⁹ be 'imi bubuna to'umalidi manudi wada doonaona ma imi nuwamwau, ta 'imi edagiyao wada sa'ugelasedi be wada dedoi, be wate 'imi gwausowala wada sa'ugelasedi be wada nuwamwau. ¹⁰ Ta wada nuwamwa'uta 'Inapwana matanaya be 'enega tauna 'ida gitu'eyemi.

'Awa to'umali mali tomota manudi

¹¹ "Tasigwao, geya'abo tasimiyao wa'awa'awa to'umaliyedi, manuna 'abo yaita tauna tasina 'i'awa to'umaliyei, nai 'iloinei, tauna nige ya Yaubada 'ina lolina 'imulimuliyei, ta esi lolina nina 'i'awa'awa to'umaliye. ¹² Ta wada mwalatoni 'aene Yaubada tebweuna lolina 'ana to'ebwaya, ta wate toloina, tauna sawesawenaya be 'i'etoseyana ta 'iloemwawasa, 'enega 'omi geya'abo gosemiyao wa'awa'awa to'umaliyedi, nai waloiloinedi.

^m 4:3 Md 6:9-13 ⁿ 4:4 1 Yo 2:15 ^o 4:5 Md 6:24 ^p 4:6 1 Pi 5:5; Yob 22:29

^q 4:7 1 Pi 5:8; Ep 6:11-12 ^r 4:11-12 Lo 2:1, 14:4

Geya'abo onalaga.

¹³Wada enono 'ai'aila, 'abo yaisigedi 'omi waona gagasa be wagwae, “Batuwa nai gibwa'i 'atatauya 'aidi 'asa sinabwadi 'ediya, be nada yakwala 'ebweuna 'amiyami, be tauma 'ima guinuwa 'ada guinuwed, be 'ada eesaesa.” ¹⁴Ta esi nigea wamwalamwalatoni yawasimi 'ina tautauya gibwa'i manuna, manuna 'abo'ada tomota 'atuwa nadigega umauma, 'iapwesa tuta gidalina tuga, ta wate 'isawala limana.

¹⁵'Ta esi 'ilobwenena gete nadigega wada gwae, “'Abo 'inapwana 'itatagwala, 'ada miyami, be yage nidi nuwanuwama 'ada guinuwed.” ¹⁶Ta gete tuga ma imi gagasa waonalaga, ta wada nuwa'i'isi 'aene onalaga yage to'umalina.

¹⁷'Enega 'abo yaita guinuwa bobo'adi 'imwalatonidiya, ta nigea 'iguiguinuwed, nate 'ina loegesi.

Toesaesao 'adi emataluwa

5 ¹“Omi toesaesao, simana gete wada nono 'ai'aili, be 'imi tuta mwau 'iabe manuna wada dedoi be wada doonaona. ²Manuna 'imi esaesao ni'atu sidaudaula, ta wate 'ami 'oamao ni'atu manumanuwa si'enidi.

³Ta wate 'imi maniyao waegagaledi 'emiya ta ni'atu simiya kadekadeli, be mani kadekadelidi getedi sida simanemi 'aene mani sinabwa wawasae waegagalena, ta mani nidi getedi tuta 'ebe losalowa 'enaya 'ida 'alasimi, 'atuwa kaiwe.

⁴Ta 'imi bagula 'adi topaisewao nigea waemaemaisa 'ai'ailidi, 'enega toguinuwa nidi 'idi lomugi be 'idi dedoi ni'atu Yaubada Toewaiwai sana 'inonona.

⁵Ta 'imi miya bale'uya bobo'ana wawasae, manuna tuta yauyauna ma imi gwausowala, 'enega ma 'ami tubuwa bobo'ana loemwawsa 'ilobwenemi, nadigega tuga sagali bawedi. ⁶Manuna taudi topalupaludi wabwa'obwa'o matadi, nai waloemwawasidi, ta nigea sawesawenaya be 'emiya sie'isa.

'Alama'i'ita manuna

⁷“Enega tasigwao, wada 'alama'i'ita 'ana laba 'ida 'Inapwana 'iilama. Nadigega tuga tobagula ma ina 'alama'i'ita 'ala'aa be bolimana soladiya 'iyamwayamwana, 'ana laba sesoi 'ana tuta 'enaya, masula uwana bobo'ana 'isesoni. ⁸“Enega 'omi wate nadigega wada 'alama'i'itana ma imi 'atepatu, manuna 'iabe 'ida 'Inapwana 'iila limanama.

^s 4:13-14 Lu 12:18-21 ^t 4:15 Gu 18:21 ^u 5:1-6 1 Ti 6:9-10; Mk 4:19; 2 Loi 24:15; Md 6:19-21 ^v 5:7 Ga 6:9; Ib 10:36-37 ^w 5:8 1 Te 3:12-13; Pi 4:5

⁹*Ta tasigwao, geya'abo taumimo waelomulomugiyemi, 'abona nai 'ida 'Inapwana 'ida bwa'omatami, ta Tobwa'omatana nina ni'atu be 'iapwesama.

¹⁰†Enega tasigwao, wada nuwa'i'isi palopitao nidi, taudi 'ida 'Inapwana manuna sietosimana. Gete 'ebe e'ita bobo'ana 'emiya, manuna palopitao nidi 'idi miyamwau 'enega sie'alama'i'itana, ta wate sitoolopa'ala. ¹¹*Ta 'abo yaisigedi taudi nadigega tada eesedi togwawsowala, manuna mwau nidi 'ediyegea sitoolopa'ala.

Ta gete wate 'ebweu 'ebe'ita Yobi 'ina 'alama'i'ita manuna. Ni'atu wamwalatonina 'aene Yobi nina 'ina miyamwau 'ana 'ebe losalowa 'enaya, 'ana 'etoseyana 'ilobena 'ida 'Inapwana 'enega. Manuna tauna 'Inapwana nina oboboma ta 'atenuwa'ole'ole 'alena.

¹²†Ta tasigwao, 'ebweu wate yage sinabwana 'edaya 'aene geya'abo wasawasawa tamatamana Tamada 'ana esanega, nai bale'u yagenao 'ediyegea, nai to yage tuga 'ediyegea, 'abo 'imi onaupaupa 'ediya, ta esi wada gwae, "O," 'abo 'imi nuwanuwa nadigega, ta 'abo nigeya, wada gwae, "Nigeya." Manuna 'abo yage sinabwadi wa'inanadi, 'etamo Yaubada 'ietalaemi.

¹³†Ta 'abo yaita 'imiyamwau, 'ilobwenena be 'ida sidasida Yaubada 'enaya. Ta 'abo yaita ma ina gwausowala, waliyegea Yaubada 'ida tupu.

¹⁴Ta 'eguma wate 'ebweu 'emiyega ma ina le'oasa, ekalesiya 'ana toanuganao 'ida bwaucedima be sida sidasida manuna, ta wate bunama 'ena sida siwa, 'ida 'Inapwana 'ana esanega. ¹⁵†Ta 'abo ma idi emisa sisidasida, Yaubada 'ida leme tole'oasa nina be 'ida bobo'ana, ta wate 'eguma ma ina to'umalina Yaubada 'ida nuwataudi.

¹⁶†Enega 'ebweuna 'ebweuna 'emiya 'imi to'umalinao wada simanedi, be manudi wada sidasida, be 'enega 'imi bobo'ana wada loba. Ona'ai'aila, topalupaludi 'idi sidasida waiwai wawasae.

¹⁷†Gete 'ebweu 'ebe e'ita 'edaya, nate Ilaitiya, tauna tomota tuga 'abo'ada nadigega, ta 'isidasida nuwana maibo'anega be 'aene geya'abo 'i'usa'usana yakwala 'etoi ta tupwana 'ediya, ga nadigega 'iapwesa.

¹⁸Enega wate 'isidasida limana ga galewega 'usana 'imwa'utama ga masula maibo'adi siuyawana limana.

¹⁹†Ta tasigwao, 'abo 'ebweu 'emiyega 'eda bobo'ana 'ipilisine be 'ebweu yaita 'oyo gosemina 'u'au'ewa limenama 'eda bobo'ana 'enaya, ²⁰†uda nuwa'i'isi 'aene toto'umalina nina yawasina mwawasega 'u'etoseyena, manuna 'ina to'umalina maibo'ana sigumwala.

'Abo'agu Yemesa.

* 5:9 1 Ko 4:5 † 5:10 Md 5:11-12 ‡ 5:11 Yob 42:10-13; 1 Pi 2:19 ¢ 5:12 Md 12:36

† 5:13 Sam 50:15; Kol 3:16 ¢ 5:15 Gu 28:8 ¢ 5:16 1 Yo 1:9; Ona 28:13

¢ 5:17-18 1 Kin 17:1, 18:1, 42, 45 † 5:19 Md 18:15; Ga 6:1 ¢ 5:20 1 Pi 4:8